

Suchbegriff:
Medium:

Comander 2023
La Quotidiana
Sommeraustrasse 32, Postfach 491, CH-7007 Chur
martin.cabalzar@somedia.ch T: +41 (0)81 255 57 10



LA QUOTIDIANA

Verbreitete Auflage: 3'443
Reichweite: 7'196

Seitenanteil: 0.08
Anzeigenäquivalenz: CHF 413

Montag, 1. Mai 2023
Tageszeitung / täglich
Seite: 1 / unten Mitte

AN120.689 LMS-13584779

Ina «plevonessa illegala»

11 votums a quatter minutas – dad 11 oraturas ed oratur da tuttas regiuns dal Grischun:
Quai è stà l'avertura da «Comander 2023» – il giubileum da 500 onns reformaziun.

«Comander 2023» – quai è numerus arranschaments, organisads da la raspada evangelica da Cuir. Cun quels commemorescha ella il 500avel anniversari da la reformaziun, ch'è vegnida instrada l'onn 1523 da Johannes Dorfmann, numnà Comander. «Nus na vulain betg mo glorifitgar il passà, mabain er analisar a moda critica il svilup e trair ordlonder las conclusiuns ne-

cessarias», ha ditg *Curdin Mark*, il parsura da la baselgia reformada da Cuir. Fatg quai han per exempel durant l'avertura festiva en la sala dal Cussegl grond da venderdi passà 11 oraturas ed oratur. Els han skizzà aspects specifics da la reformaziun en las valladas grischunas. Uschia ha tranter auters *Christina Grapez* discurrì davart sia tatta Greti Caprez-Roffler, la «plevonessa il-

legala» da Furna. *Chasper Pult* ha documentà, che la reformaziun n'è betg stada mo ina reformma ecclesiastica, mabain cunzunt era ina revoluziun culturala. Ed il supstant da la plaiv evangelica Val Alvra *Wolfgang Schütz* ha discurrì da las experientschas cun la fusiun da las plaivs en Val Alvra e Surses, 12 plaivs cun trais linguas – ina vaira sfida. (fmr)

Pagina 2

98% der Originalgröße



Comander 2023 – vuschs polifonas tar 500 onns reformaziun

Quest onn sa radunda il 500avel anniversari da la reformaziun, instradada 1523 da Johannes Comander a Cuir. Da Cuir anora è quest moviment reformatoric che n'è betg stà mo ina reforma religiosa, s'irradià en l'entir chantun introducind in process d'innovaziun e democratizaziun che ha influenzà a moda persistente la cultura e la politica grischuna.

MARTIN CABALZAR/FMR

La raspada evangelica da Cuir commemorecha il 500avel anniversari da la reformaziun, pia in term istoric sut il titel «Comander 2023». Quai fa ella cun numerus arranchaments resumads sut ils accents tematics: disputaziun, raspada, teater e cultura, meditaziun e punt en l'avegnir (antistitium 2023+). Per l'entir project che cumpiglia era pliras publicaziuns ed in gieu en il liber ha la Plaiv reformada Cuir sbursà in credit da 1,347 milliuns francs. Questa fin d'emna ha gi lieu il cumenzament fulminant da las festivads en preschientscha d'in grond ed il-luster publicum en la sala dal Cussegl grond a Cuir. Sco quai ch'il parsura da la baselgia reformada da Cuir, *Curdin Mark* ha accentuà, stantan las festivads commemorativas en l'ensaina da la convivencia, dal stgomi e da la varietad d'opiniuns. «Nus na vulain betg mo glorifitgar il passà, mabain er analisar a moda critica il svilup e trair ordlonder las conclusiuns necessarias», ha ditg *Curdin Mark*. En questa lavur scientifica cooperescha la plaiv stretgamaun cun l'Institut per la perscrutaziun da la cultura dirigi da *Cordula Seger* e cun l'Archiv municipal da Cuir. En quest connex è cumpari dacurt la publicaziun «Glaube und Bewährung – 500 Jahre Reformation in Chur 1523–2023».

L'avertura festiva en la sala dal Cussegl grond è vegnida introducida venderdi saira cun pleds gratulatorics dal president da la regenza *Peter Peyer*, dal parsura da la citad *Urs Marti*, dal istoricher *Sebastian Brändli* e dal representant dals Waldensers *Emanuele Fiume*. Per ils intermezos musicals han *Josias Just* (clarinetta) ed *Andrea Kuratle* (clavazin) procurà. Sco moderatura ha *Maria Victoria Haas* manà suveranain tras il program.

Er ina reforma culturala e politica

En curts votums limitads a quatter minutas han 11 oraturas ed oraturs skizzà aspects specifics da la reformaziun en las valladas grischunas. La sociologa e schurnalista *Christina Caprez* ha raquintà da las adversitads cun las qualas sia tatta, Greti Caprez-Roffler (1906–1994) è stada confruntada sco emprima plevonessa betg mo en il Grischun, mabain er en Svizra. Cunter la ferma opposiziun da la Sinda retica ha la plaiv da Furna gi il curaschi d'eleger ella 1931 sco «plevonessa illegala».

L'istoricher *Daniele Paparella* ha rapportà dals cumbrats per part sanguinus en connex cun la reformaziun en las valladas talianas Bregaglia e Puschlav, menziunond tranter auter er il mazament collectiv en Valtellina. Gest sin in cunfin cun l'Italia saja la suppressiun dals reformads natiralmain stada fig virulent. Tuttrina haja l'entira Bregaglia ed ina terza dal Puschlav adaptà la nova cretta. En l'ufficina da Poschivants saja schizunt in dals emprims cudeschs rumantschs vegni stampà.

Cun exempels da las scrittiras religiosas dal giurist samedrin *Jachiam Bifrun* (1506–1572) e la «Bibla da Scuol», in'ovra monumental da *Jacob Anton Vulpis* (1629–1706), ha *Chasper Pult* documentà che la reformaziun n'è betg stada mo ina reforma ecclesiastica, mabain cunzunt era ina revoluziun culturala.

Da sia stentusa lavur en la diaspora reformada da la Cadi ha rapportà l'antierur preditgant *Roland Just*, constatond ch'i haja duvrà bler pazienza ed in aut grad da toleranza da frustraziun per tegnair la dira durant 33 onns a Mustér en la sumbriva da la claustra. Sia plaiv saja stada fig eterogena, en ses center «Aua



Cun numerus arranchaments commemorecha la plaiv reformada da Cuir il giubileum centenar da la reformaziun entras Johannes Comander.

FOTO PLAIV REFORMADA CUIRA

«Nus na vulain betg mo glorifitgar il passà, mabain er analisar a moda critica il svilup e trair ordlonder las conclusiuns necessarias.»

Curdin Mark,
parsura baselgia reformada Cuir

viva» s'entupavan cunzunt persunas emigrads, domiciliadas per l'entira Surselva enturn.

Plaivs reformadas avant novas sfidas

L'archivar e supstant da la plaiv evangelica Val Alva, *Wolfgang Schütz* ha relatà da las experientschas cun la fusiun da las plaivs en Val Alva e Surses. La reuniun da 12 plaivs ord dus Colloquis differents e cun trais linguas (surmiran, puter e tudestg) saja stada ina gronda sfida, tant pli che l'interess per fats da baselgia daventian adina pli pitschens. *Wolfgang Schütz* ha pledentà perquai per ina collavuraziun pli intensiva cun las plaivs catolicas per uschia pudair rinforzar las ragischs e valitas cuminaivlas dal cristianissem.

L'istoriografa *Mirian Nicoli* è s'occupada da la situaziun bi-confessiunala da las famiglias aristocratas en il Mesauc. Entant che lètgms machadadas tranter il pievel cumin n'erain betg bainvisas, vegnivan ellas plitost toleradas tranter l'aristocrazia che pudeva uschia mantegnair ed augmentar meglier la pussanza.

L'istoricher d'art *Leza Dösch* ha referi davart l'architectura da la baselgia Comander a Cuir. Da las quatter baselgias reformadas a Cuir (Marrin, Regula, Masans e Comander) è Comander la suletta ch'ei vegnida construida sco

baselgia protestanta. Ella è vegnida erigida 1956/57, pia pir 400 onns suenter la mort da Comander (guarda box) tenor ils plans da l'architect *Flurin von Planta*. Ses intern è magari spartan e focussà sin maisa d'altar e chanzla. Tant pli generus è il clutger e la piazza avant baselgia dimensiunada.

L'istoricher *Adrian Collenberg* ha infurmà davart ils embrugls che la reformaziun ha chaschunà cunzunt en Tumleatg che tutgava per grond part al domini da l'uvestg da Cuir ed aveva cun la claustra da Cazes ina ferma posiziun. Cun main impediments è la reformaziun stada confruntada en Val Schons e Valragn che aveva pudì sa deliberar gia baud da lur signurs feudals.

La scienziada da musica *Laura Decurtins* è s'occupada da la promozion extraordinaria dal chant en la plaiv da Zuoz, che ha promovì gia baud cun success il chant polifon, impiegava in dirigent e remunerava era quel commensuradain.

Dal moviment zelot dals pietists, da lur finamiras cuminaivlas, ma era da lur divergenzas cun ils reformaturus ha *Holger Finze-Michaelsen* referi.

Ord la pratica e las sfidas dal mintgadi en la pastoraziun ha raquintà la plevonessa da Tavau *Ursina Hardegger*. Ella ha accentuà la necessitad da s'occupar dapli dals problems e basesgns concrets da la populaziun en ses mintgadi da chattar da cuminanza soluziuns pussivlas.

La dieta è sa continuada la sonda cun referats da ser *Jan-Andrea Bernhard* davart la l'reformatur Johannes Comander, da *Peter Opitz* davart la muntada da las disputaziuns che han gi lieu a Turig ed en il Grischun, e da profesurassa *Eva-Maria Faber* davart las schanzas istoricas ed ecumenas d'emprerder per la sinodalitad actuala. Plinavant hai da referats d'input da *Florian Hitz*, *Randolph C. Head*, *Immacolata Saule Hippenmeyer* e *Rita Famos* davart: libertad da cardientscha, coesistenza, plaiv e raspada, baselgia e stat. Suandada è ina disputaziun tranter ils referents, moderada da *Maria Victoria Haas* che studegia actualmain teologia a Lucerna.

Tgi è Comander?

Johannes Dorfmann (1485–1557), numnà Comander, è stà figl d'in chapeller da Maivilla. El ha frequentà il gimnasi claustral a Son Gagl e studegià a l'Universitad da Basilea. A Son Gagl ha el emprindì d'enconuscher il posterur reformatur Vadian, a Basilea

Zwingli. Suenter il studi è Comander stà plevant ad Escholzmatt (LU). L'onn 1523 ha il cussegl da la citad da Cuir clamà el sco plevon en la baselgia da S. Martin. Sias famusas pregias èn prest stadas enconuscentas lunsch enturn ed a la disputaziun da 1526 a

Glion è vegni preschentà 18 tesas che n'han betg mo revoluziunà la baselgia, mabain era promovì il process da democratizaziun entaifer las Trias Lias ed uschia gi ina gronda irradiaziun per il svilup politic e cultural en l'entir Grischun. (fmr/mc)